



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL**

Komunikadu Imprensa

23 Setembru 2021

**JSMP Audénsia ho Prezidente Tribunál Rekursu:
edifísiu foun Tribunál Distritál sira sei iha fatin espesífiku ba arguidu, vítima no
testemuña**

Iha 20 Setembru 2021, ekipa *Judicial System Monitoring Programme-JSMP* halo audénsia ho Meritísimu Juis Konselleru, Prezidente Tribunál Rekursu (PTR), Dr. Deolindo dos Santos, iha Edifísiu Tribunál Rekursu, Dili.

Audénsia ne'e ho objetivu atu introdús estrutura foun JSMP nian no apresenta JSMP ninia serbisu sira, liuliu unidade foun kona-ba Serbisu Apoiu ba Vítima. Alende ne'e, JSMP hato'o mós apresiasaun ba mudansa ne'ebé akontese iha tribunál.

Iha JSMP nia apresentasaun, depoisde JSMP agradese ba PTR nia tempu ne'ebé bele simu JSMP ho ekipa, JSMP apresenta kedas estrutura foun JSMP nian no husu nafatin kolaborasaun no apoia husi tribunál. Tuir mai, JSMP apresenta serbisu JSMP nian inklui introdús unidade foun kona-ba Serbisu Apoiu ba Vítima ne'ebé hari'i hodi fó assisténsia legál ba vítima violénsia bazeia ba jéneru hanesan ba krime sira abuzu seksuál ba menór, violasaun seksuál, kazu violénsia doméstika inklui kazu sivíl ezersísiu podér paternál no alimentasaun ba menór sira. JSMP mós la haluha apresia ba mudansa lubuk ida liuliu facilidade tribunál sira, hanesan kareta ba juis sira, komputadór ba kada juis no mós fornese *kobe house* ba iha tribunál rua hodi hatan ba limitasaun espasu. Alende ne'e, apresia mós ho serbisu turnu iha tribunál sira durante Estadu aplika Serka Sanitária no Konfinamentu Obrigatóriu.

Iha hasoru malu ne'e, JSMP mós hato'o rekomendasaun ba iha PTR atu iha futuro bele iha mós juis espesífiku ba kazu violénsia bazeia ba jéneru inklui mós iha juis espesífiku ba kazu korrupsaun. Alende ne'e, JSMP hato'o kestaun sira ne'ebé iha ligasaun ho ema ho defisiénsia bainhira atu asesu ba justisa formál, hanesan kondisaun facilidade sira iha tribunál ne'ebé seidak bele asegura ema ho defisiénsia (rampa no haris fatin).

Antes responde ba hanoin no preokupasaun hirak ne'e, PTR agradese ba JSMP tanba JSMP halo ninia papél ne'ebé importante hodi tau-matan ba setór justisa nune'e bele hadi'ak liután serbisu sira setór justisa nian. Ho estrutura foun ne'e, PTR husu atu nafatin serbisu hamutuk hodi hatu'ur justisa ho loloos ba ema hotu ne'ebé mak buka justisa.

Hatan ba asuntu kriasaun unidade Serbisu Apoiu Vítima, PTR konsidera nu'udar iniciativa ida ne'ebé di'ak tebes atu bele ajuda vítima sira ne'ebé buka justisa, alende ne'e bele lori mudansa foun no ambiente foun ne'ebé diferente ho organizasaun seluk.

Relasiona ho facilidade tribunál sira nian, PTR hateten katak ho orsamentu limitadu koko atu reponde preokupasaun balun no sei kontinua atu responde preokupasaun sira hotu iha tinan sira mai nune'e bele fasilita serbisu di'ak liután.

Iha biban ne'e, PTR mós informa katak tuir planu, tinan 2022 sei hari'i tribunál foun iha munisípiu sira ne'ebé indika ona mak hanesan Munisípiu Ermera, Munisípiu Bobonaro no Vikeke no sei halo mós konstrusaun edifísiu foun ba Tribunál Distritál Baukau no Tribunál Distritál Suai. Konstrusaun Tribunál Distritál Dili agora la'o dadaun hela no espera bele remata iha tinan oin. PTR haktuir tan katak edifísiu tribunál sira foun ne'e, sei iha sala hein ketak ba vítima, arguidu inklui testemuña sira, nune'e bele responde ba preokupasaun ema hotu nian ne'ebé preokupa kona-ba fatin hein ba parte sira ne'ebé hamutuk de'it bainhira iha tribunál. Alende ne'e, PTR mós informa katak tribunal sei halo kontratu ho organizasaun defisiénsia sira atu ajuda tribunál sira iha lian jestuál.

Enkuantu kona-ba tribunál movel, PTR hateten katak agora dadaun iha mekanizmu foun hodi jere atividade tribunál movel nune'e bele efetivu liután. Tanba ne'e, PTR husu ba JSMP atu kontinua tau-matan ba atividade julgamentu movel ne'e.

Relasiona ho juis espesífiku ba iha kazu sira ho natureza violensia bazeia ba jeneru no korrupsaun, PTR konkorda ho hanoin JSMP nian no iha possibilidade atu koloka mós juis espesífiku ba kazu sira refere, maibé kestaun mak rekursu umanu. Tanba ne'e, tuir PTR Sentru Formasaun Jurídiku no Judisiáriu ne'ebé nu'udar fatin hodi prodús autór tribunál foun sira presiza reativa filafali.

Ikus liu, PTR dala ida tan apresia ho JSMP ninia serbisu no husu atu serbisu di'ak liután no kontinua serbisu hamutuk ho tribunál atu lori justisa ba ema hotu.

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>

Rua Beco Lakateu, Aldeia Manu fuik, Suku Kolmera, Administrativu Vera Cruz
Munisípiu Dili, Timor-Leste
P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste